

## An Ghaeilge ar an imeall

**Ceist 1** Beidh tú ag féachaint ar ball ar thuairisc faoi úsáid na Gaeilge i gComhairle Contae na Gaillimhe. Sula bhféachann tú ar an tuairisc pléigh na ceisteanna seo leis an duine in aice leat nó le do ghrúpa:

Cad iad na teangacha oifigiúla in Éirinn? An mbaintear úsáid astu de ghnáth i gcruinnithe poiblí? Cén fáth? Conas is féidir rogha níos fearr a thabhairt do dhaoine ar mhaith leo rogha teanga a bheith acu?

**Ceist 2** Anois féach ar an tuairisc cúpla uair agus déan iarracht an leagan Gaeilge de na focail seo thíos a aimsiú inti. Ansin cuir do chuid freagraí i gcomparáid le cinn an duine in aice leat.

An bhfuil mórán díobh ar eolas agat sula bhféachann tú ar an tuairisc?

1. switch to English \_\_\_\_\_
2. interpreting service \_\_\_\_\_
3. in danger \_\_\_\_\_
4. limiting the use of Irish \_\_\_\_\_
5. choice \_\_\_\_\_
6. earphones \_\_\_\_\_
7. in order to get an English translation \_\_\_\_\_
8. if they don't wish to \_\_\_\_\_
9. small minority \_\_\_\_\_
10. according to a survey \_\_\_\_\_

**Ceist 3** Anois féach ar an tuairisc arís agus déan iarracht freagraí na gceisteanna seo a aimsiú. Ansin pléigh na freagraí leis an duine in aice leat.

1. Cén teanga a úsáidtear ag cruinnithe de Chomhairle Contae na Gaillimhe?
2. Cén cineál seirbhíse a chuirtear ar fáil do chomhairleoirí gan Ghaeilge?
3. An mbaineann an comhairleoir Tiernan Walsh úsáid as an tseirbhís sin? Cén fáth?
4. Cén t-éileamh atá á dhéanamh ag an gcomhairleoir Walsh?
5. Cén dearcadh atá ag an gcomhairleoir James Joyce faoin scéal?
6. Cad a deir an Coimisinéir Teanga faoin gcás seo?
7. Cad a thaispeáin an suirbhé a rinne *Lá Nua* faoi chomhairleoirí contae na Gaillimhe agus úsáid na Gaeilge?

**Ceist 4**

'Tá caint *tarraingthe* ag comhairleoir contae amháin i nGaillimh.'  
'Le roinnt blianta anuas tá rogha *tugtha* do chomhairleoirí chontae na Gaillimhe a gcuid cainte a dhéanamh i mBéarla nó i nGaeilge.'

Cén ghné den ghramadach atá i gceist leis na focail i gcló iodálach thuas? Pléigh iad leis an duine in aice leat. Mura bhfuil sibh cinnte cabhróidh an teagascóir libh.

Anois críochnaigí na habairtí a leanas ag baint úsáide as na focail idir lúibíní.

1. Ní féidir an teach nua a thógáil go dtí go mbíonn an seanteach \_\_\_\_\_ . (leag)
2. Níor aontaigh an comhairleoir James Joyce leis an méid a bhí \_\_\_\_\_ ag an gcomhairleoir Walsh. (abair)
3. Nuair a bhí na páistí \_\_\_\_\_ a chodladh ag Máire, shuigh sí síos cois tine chun an nuachtán a léamh. (cuir)
4. Beidh áthas ar na mic léinn nuair bheidh an téarma \_\_\_\_\_ . (críochnaigh)
5. Nuair a bhí an litir \_\_\_\_\_ ag Séamus, shínigh sé í agus chuir sé sa phost í. (scríobh)

**Ceist 5**

'Dúirt an Coimisinéir Teanga gur mionlach beag a chuireann i gcoinne na Gaeilge ag *cruinnithe*.'  
'Ní gach uile dhuine atá ag iarraidh na *cluasáin* a chur orthu.'

Anois an féidir leat féin agus an duine in aice leat na bearnaí thíos a líonadh?

1	cruinniú	cruinnithe
2	cluasán	cluasáin
3	rogha	
4	comhairleoir	
5	mionlach	
6	ceantar	
7	teorainn	
8	pointe	
9	tuairisc	
10	litir	
11	aistriúchán	
12	masla	

**Ceist 6**

Pléigh na ceisteanna seo leis an duine in aice leat nó le do ghrúpa:

An aontaíonn sibh leis an gcomhairleoir Walsh gur cheart do chomhairleoirí an Béarla a úsáid má tá siad ag caint go díreach leis i gcrúinníú? Cén fáth nach dteastaíonn uaidh na cluasáin a úsáid, dar libh? Cén réiteach atá ar an scéal?

## Treoracha agus Freagraí

### Ceist 1

Tá an plé seo le déanamh sula seinntear an tuairisc.

### Ceist 2

Is féidir iarraidh ar na mic léinn triail a bhaint as na focail ar dtús sula bhfeiceann siad an tuairisc agus ansin arís agus an tuairisc ar siúl.

1. iompú ar an mBéarla
2. seirbhís ateangaireachta
3. i mbaol
4. ag cur teorann le húsáid na Gaeilge
5. rogha
6. cluasáin
7. ar mhaithe le haistriúchán Béarla a fháil
8. mura mian leo
9. mionlach beag
10. de réir suirbhé

### Ceist 3

1. Tá rogha tugtha do chomhairleoirí chontae na Gaillimhe a gcuid cainte a dhéanamh i mBéarla nó i nGaeilge ag cruinnithe de chuid na Comhairle.
2. Cuirtear seirbhís ateangaireachta ar fáil.
3. Níl sé de chleachtadh ag an gcomhairleoir contae Tiernan Walsh an tseirbhís ateangaireachta a úsáid ag cruinnithe de chuid Chomhairle Chontae na Gaillimhe mar, a deir sé, go hiondúil is gnó a bhaineann le ceantair eile agus ní a cheantar féin a bhíonn á phlé i nGaeilge.
4. Deir sé nach bhfuil sé i gcoinne na Gaeilge agus go bhfuil sé de cheart ag daoine Gaeilge a labhairt ag an cruinnithe más mian leo. An pointe atá aige ná más rud é go bhfuil na comhairleoirí contae a labhraíonn Gaeilge ag iarraidh pointe a dhéanamh dósan, ba cheart go ndéarfadís i mBéarla é.
5. Má tá duine ag labhairt i nGaeilge, ní dóigh le James Joyce gur cheart go mbeadh orthu labhairt i mBéarla ina dhiaidh. Níl aon deacracht aige leis na cluasáin sa Chomhairle Contae. Tá áthas air go bhfuil siad ann agus gur féidir le daoine iad a úsáid más mian leo. Mura mian leo, is iad féin a bhéas thíos leis, a deir sé.
6. Deir an Coimisinéir Teanga gur mionlach beag an dream a chuireann i gcoinne na Gaeilge ag cruinnithe. Níor cheart, a deir sé, teorannú a dhéanamh ar an nGaeilge mar go gcuireann sé sin an teanga ar an imeall agus i mbaol.
7. De réir suirbhé atá déanta ag an bpáipéar *Lá Nua*, deir formhór na gcomhairleoirí contae go n-úsáideann siad an tseirbhís ateangaireachta. Tá roinnt eile a deir go bhfuil siad sásta lena gcuid Gaeilge féin agus nach dteastaíonn aistriúchán uathu.

**Ceist 4**

An aidiacht bhriathartha atá i gceist anseo.

1. leagtha
2. ráite
3. curtha
4. críochnaithe
5. scríofa

**Ceist 5**

1	cruinniú	cruinnithe
2	cluasán	cluasáin
3	rogha	roghanna
4	comhairleoir	comhairleoirí
5	mionlach	mionlaigh
6	ceantar	ceantair
7	teorainn	teorainneacha
8	pointe	pointí
9	tuairisc	tuairiscí
10	litir	litreacha
11	aistriúchán	aistriúcháin
12	masla	maslaí

**Ceist 6**

Is féidir gach beirt a chur ag déanamh an phlé seo agus ansin cuid de na ceisteanna a phlé leis an rang iomlán.

## Eimear Ní Chonaola

Tá caint tarraingthe ag comhairleoir contae amháin i nGaillimh mar go gceapann sé gur cheart do chomhairleoirí a labhraíonn i nGaeilge iompú ar an mBéarla má bhíonn rudaí á bplé i nGaeilge a mbeadh suim ag gach uile dhuine iontu. Tiernan Walsh a dúirt é seo cé go bhfuil seirbhís ateangaireachta ar fáil ag cruinnithe Chomhairle Chontae na Gaillimhe. Dúirt an Comisinéir Teanga, Seán Ó Cuirreáin, go mbeidh an Ghaeilge i mbaol má thosaítear ag cur teorann le húsáid na Gaeilge ag cruinnithe. Tá tuilleadh faoin scéal ag Áine Lally.

## Áine Lally

Le roinnt blianta anuas tá rogha tugtha do chomhairleoirí chontae na Gaillimhe a gcuid cainte a dhéanamh i mBéarla nó i nGaeilge ag cruinnithe de chuid na Comhairle. Tá seirbhís ateangaireachta ar fáil anseo in Áras an Chontae ach ní gach uile dhuine atá ag iarraidh na cluasáin a chur orthu ar mhaithe le haistriúchán Béarla a fháil. Níl sé de chleachtadh ag an gcomhairleoir contae Tiernan Walsh na cluasáin a úsáid ag cruinnithe<sup>1</sup> de chuid Comhairle Contae na Gaillimhe mar, a deir sé, go hiondúil is gnó a bhaineann le ceantair eile agus ní a cheantar féin a bhíonn á phlé i nGaeilge. Níl sé i gcoinne na Gaeilge agus deir sé go bhfuil sé de cheart ag daoine Gaeilge a labhairt ag na cruinnithe más mian leo. An pointe atá aige ná más rud é go bhfuil na comhairleoirí contae a labhraíonn Gaeilge ag iarraidh pointe a dhéanamh dósan, ba cheart go ndéarfadís i mBéarla é. Ní aontaíonn gach uile chomhairleoir contae leis seo.

## James Joyce

Má tá duine ag labhairt i nGaeilge, is leor sin. Ní dóigh liomsa go mba cheart dóibh.....go mbeadh orthu labhairt i mBéarla ina dhiaidh. Níl aon deacracht agamsa leis na cluasáin sa Chomhairle Contae. Tá áthas orm go bhfuil siad ann agus gur féidir le daoine iad a úsáid más mian leo agus mura mian leo iad a úsáid, bhuel, is iad féin a bhéas thíos leis.

## Áine Lally

Inniu dúirt an Coimisinéir Teanga gur mionlach beag an dream a chuireann i gcoinne na Gaeilge ag cruinnithe. Níor cheart, a deir Seán Ó Cuirreáin, tosnú a dhéanamh ar theorannú ar an nGaeilge mar go gcuireann sé sin an teanga ar an imeall agus i mbaol. De réir suirbhé atá déanta ag an bpáipéar *Lá Nua*, deir formhór na gcomhairleoirí contae i nGaillimh go n-úsáideann siad na cluasáin. Tá roinnt eile a deir go bhfuil siad sásta lena gcuid Gaeilge féin agus nach dteastaíonn aistriúchán uathu.

Áine Lally, Nuacht TG4, i gcathair na Gaillimhe

---

<sup>1</sup> *cruinneachaí* a deirtear sa mhír